



2023-mut Nunatta Karsiata naatsorsuutaasa akuersissutigineqarnissaannik siunnersuut.

(Aningaasaqarnermut Akileraartarnermullu Naalakkersuisoq)

(Siullermeerneqarnera)

Qujanaq 2023-mut Nunatta Karsiata naatsorsuutaasa saqqummiunneqarneranut. Iluarisimaarinnippunga – aappaatigullu isornartoqartitsillunga.

Pitsaanerit aallaqqaasiutigilakka. Soorunami pitsaasuuvuq, Nunatta Karsia annertuumik 2023-imi sinneqartoormat. Nuannertuaannarpoq, aningaasaqarneq ingerlalluaraangat. Imaallaat uagut politikkerit periarfissittarpaatigut suliniutinik pilersitsiniarnernillu aallartitsinissamut innuttaasunut iluaqutissanik.

Taamaaleriarlunga isornartortaa tikissavara. Pitsaangilluinnarpoq, Aningaasaqarnermut inatsimmi naatsorsuutigisat taama assigiinngitsigineri aammalu Nunatta Karsiata naatsorsutaasa inerneru. Nikingassut 415 millioner koruunit, aningaasarparsuit.

Tassani pingaartuuvuq eqqaamassallugu, uagut politikkeritut akisussaassuseqartariaqarnerput. Aningaasanik atuiinnarsinnaanngilagut, piginningsatsinnik. Tassani Naalakkersuisut naatsorsuutaat ataqqsariaqarpagut. Naatsorsuutillu Naalakkersuisuniit takutissimavaat, 2023-imi 16 millioner koruuninik sinneqartoornissarput naatsorsuutigissagipput. Sinneqartoorut taama annertugisassaanningsigitillugu politikikkut sipaarniarnermik takutitsisariaqarpugut. Ima isumaqarpoq, akileraarutinut- akitsuutinullu appaaginnarsinnaanngitsugut. Aningaasaleerujussuarsinnaanngilagut Peqqinnissaqarfimmi pissutsinut aaqqiissutissanik. Taamatutaaq sammisanut allanut taamatut oqaaseqarsinnaagaluarpunga.

Kingornatigulli paasinarsimmat sinneqartoorut 16 millioner koruuniinnaanani 400 millioner koruunit sinnerlugit annertutigisoq, eqqarsanngitsoorsinnaanngilanga, innuttaasunut pitsassuarnik iliuuseqarsinnaasimagaluarnarput taakku aningaasat atorlugit. Tamanna uggornartorujussuuvuq. Taamaattumilluuna piumasarisariaqaripput, Naalakkersuisut tungaanniit pitsaanagerusumik naatsorsuusiortarnissaq. Naatsorsuinerlunnerit innuttaasunut tuttarput.

Taamaattumik Naalakkersuisut piumaffigerusuppakka nalunaarusioqqullugit peqqutaasut suunersut, aallaqqaammut taama naatsorsuinerlutsigisimanerput. Taamatutaaq Naalakkersuisut piumaffigerusuppakka nalunaarusioqqullugit suliniutinik pilersitassallu suut aallartissimaneraat eqqornerusunik naatsorsuutinik saqqummiussisalnissaminut.

Eqqaamasariaqarparput, innuttaasut sullikkatsigit. Demokraatini isumaqarpugut, innuttaasunut ulluinaat pitsaanerulernissaannut suliniutinik pitsaasut ingerlassinnaalluaraluarlutigit, ajornakusoorporli, naatsorsuutit misissueqqissaarnerillu pisartakkagut kukkulluinnartarmata pitsaangitsumillu isummernissatsinnut tungaviliisarlutik.



Kukkunersiuinermut ataatsimiititaliami 2023-mut Nunatta Karsiata naatsorsuutaasa misissornissaat qilanaaraarput, tassungalu ataatsimiititaliamut siunnersuut innersuullugu.